

28 SEP 1997

Perancis-Kebakaran

KEBAKARAN HUTAN INDONESIA BOLEH DIATASI, KATA PAKAR PERANCIS

KUALA LUMPUR, 28 Sept (Bernama) -- Pakar kebakaran Perancis hari ini berkata kebakaran hutan di Indonesia boleh diatasi jika anggota bomba mengetahui prosedur yang betul untuk menghadapinya.

Lt Col Charly Bastaroli, yang mengetuai pasukan Perancis bagi memberi nasihat teknikal kepada Malaysia, berkata kebakaran hutan boleh diatasi dengan mengikut keadaan rupa muka bumi dan anggota bomba dapat bergerak di hadapannya.

Kira-kira 2,000 anggota Jabatan Bomba dan Penyelamat Malaysia berada di tiga tempat di Indonesia bagi membantu memadamkan api yang membakar kawasan hutan dan perladangan menyebabkan keadaan berjerebu melanda beberapa negara di rantau ini termasuk Malaysia, Brunei, Singapura dan sebahagian daripada Indonesia.

Bagaimanapun, Bastaroli mengakui adalah sukar baginya menentukan tempoh mengawal atau memadamkan api kerana pasukannya tidak melihat kawasan yang terlibat.

Ketika bercakap kepada pemerita pada majlis demonstrasi penggunaan peralatan memadamkan kebakaran di sini, beliau berkata jika api marak dengan besar, langkah segera anggota bomba ialah melindungi nyawa dan harta benda dengan cuba mengalihkan hala api ke kawasan lain.

Bastaroli berkata pasukannya, yang datang atas permintaan kerajaan Malaysia, akan menyalurkan pengetahuan mereka mengenai prosedur memadamkan kebakaran menggunakan helikopter kepada para anggota bomba tempatan.

Ketika ditanya mengapa pasukan itu berada di sini dan bukannya di Indonesia, beliau berkata kerajaan Indonesia tidak meminta bantuan Perancis memadamkan kebakaran itu.

"Perancis mempunyai perjanjian kerjasama dengan Malaysia tetapi tidak dengan Indonesia," katanya.

Bastaroli berkata Perdana Menteri, Datuk Seri Dr Mahathir Mohamad, melawat unitnya semasa beliau mengadakan lawatan rasmi ke Perancis tahun lepas.

Unit itu adalah di bawah bidang kuasa Kementerian Dalam Negeri Perancis.

Bastaroli berkata kebakaran di Indonesia adalah sangat besar berbanding kebakaran yang pernah dialami oleh pasukan itu sebelum ini.

"Contohnya, kebakaran hutan di Marseille baru-baru ini yang melibatkan kawasan seluas 5,000 hektar... bagi kami ia sudah besar dan di sini (Indonesia), ia adalah sangat besar," katanya.

Beliau berkata kebakaran di kepulauan Reunion pada 1992 memusnahkan kira-kira 7,000 hektar tanah dengan tanaman yang sama seperti kebakaran di Indonesia.

Bastaroli berkata hujan lebat mungkin dapat membantu memadamkan api di bahagian permukaan tanah tetapi masa yang lama diperlukan untuk memadamkan api di dalam tanah. -- BERNAMA

MAM NAK